



partii naleraq

UPA 2016/20-01

12.04.2016

**Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat nr. Xx, xx, xxx 2016-imeersoq.**

Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaattut siunnersuut Partii Naleqqamiit imannak oqaaseqarfigissuarput.

Ukiorpassuannortuni Kommunini Namminersorlutillu Oqartussani missingersuutit naatsorsuutillu pillugit ukiut tamaasa siunnersuuterpassuit oqallinnerpassuillu pisarput aamma taamaattussaavoq, kisianni apeqqutit ilaatigut Kalaallit Nunatta qanoq iliornikkut aningaasanik amerlanerpaanik maani nunami uninngasitsisinnaanera atuilluarnerulersinnaaneralu annerusumik eqqarsaatigineqarneq ajortutut ippoq. Pingaartumik maanna missingersuusiortarneq naatsorsuutillu pillugit inatsisissatut siunnersuummi kommunit aamma ilanngullugit ataatsimut inatsiseqartinneqarnissaat siunnersuutigineqarmat. Tassagooq EU-p kalaallit nunatsinnik suleqateqarneranut atatillugu isumaqatigiissutikkut piumasaqaataanut ilaammat.

Siunnersuummut nalinginnaasumik oqaaseqaatini allaaserineqartut ilagaat, kommunit aqunneqarnerat pillugu inatsimmi missingersuusiortarnermut naatsorsuusiortarnermullu tunngasut malunnaatilimmik allangortinnagit maanna inatsisissatut siunnersuummut ilanngunneqaannartut.

Taamaattumik uani siunnersuummi kommunit nammineersinnaanerisa kiffaanngissuseqarnerisalu qitiusumiit aqunniarneqarnerat sakkortuumik apeqquserparput, piumasaqaatigalugulu ataatsimiititaliami susasaqartumi sukumiilluinnartumik tamanna eqqartorneqassasoq.

Tassa isumaqaratta kommunit innuttaasut qanimut suleqatigalugit aamma aningaasaqarnerup tungaatigut kiffaanngissuseqarnerullutik nammineersinnaanertik atorlugu ingerlatsinerulernissaat nukittorsartariaqartoq. Aamma eqqaamasariaqarpoq kommunit akisussaaffinnik suliassaqarfinnillu suli annerusunik tiguisussaapput, tassami kommunerujussuit pilersinneqarnerisa siunertaat anguneqassappat, suliassaqarfiit kommuninut nuunneqartussat suli amerlasoorujussuupput.

Nalunngilarpummi tamatta aningaassanik amerlanerusunik pisariaqartitsilluta, tassami siunnersuuterpassuit nunatta aningaasarsiorluarnerunissaraluanut atorluarneqarsinnaasut akissaqartinneqanngillat, illua-tungaaticullu aningaasarpassuit nunatsinniik annerusumik itinerusumillu eqqarsaatiginagit aniatippavut.

Sanaartugassanut Iluarsagassanullu Aningaasaateqarfiup saniatigut Piffissaq angasinnerusoq eqqarsaatigalugu Aningaasaliissuteqartarnissamut Aningaasaateqarfimmik pilersitsinissaq tamakkiisumik taperserparput.

Oqaluinnarsinnaanngilagut utoqqaat amerliartormata, sulisinnaasullu ikiliartormata siunissaq ernumanarnerarlugu. Uagut-una politikkerit aningaasaqarnikkut ilorraap tungaanut saatitsinissamut allannguinnissatsinnut aaqqissuusseqqinnissamullu sapiissuseqarnerulluta piumassuseqarnerusariaqartugut.

Takorluulaariartigu, nunarput nunanut allanut niuernermini ukiut tamaasa milliard-it kr-it sinnerlugit amingartooruteqartarpoq.

Suliffissaaleqisut amerlangaluaqisut, inuusuttortavut ilinniarusukkaluarlutik praktik-erfissaqannginneq pissutigalugu ingerlariaqqissinnaanngitsut, nunatta avataaniit sulisussanik tikisitsiortorpugut, sanaartormermik suliallit suliassaminnik amingaateqartaraluartut suliffeqarferujussuit nunatta avataaneersut suliassaqartinneqarnissaat isumagisatta ilagaat ?

Taamaammat Kommunini Namminersorlutillu Oqartussani missingersuusiortarnermut naatsorsuutillu pillugit inatsimmik nutarterinermi partiit tamaasa kaammattorpavut, aningaasat nunatsinni atugassaritinneqartut qanoq ililluni nunatsinneersunik sulisoqarnikkut, aamma nunatta pissarititaanik atorluaanerulernikkut, suliffeqarfiit nunatsinneersut atorneqarnerulernerisigut, avataaneersunillu isumalluuteqarpallaarunnaarnermik aallaaveqartumik nikussaarnerulerneramik tungaveqartumik aallussinerulernikkut piviusunngortitsinissaq anguniaqqullugu !

Naammanngilarmi oqaannassalluni missingersuutit tamarmik ukiunut sisamanut oqimaatigiisinneqassapput imaluunniit sinneqartoorfiussapput. Naak nalunngereerlutigu inuussutissarsiutinik pilersitsinerit, sanaartorerit il.il. inuiaqatigiit aningaasaqarniarnerannut iluaqutaasussat tamarmik aningaasanik naleqartut.

Allaffissornermut ingerlatsinerumullu aningaasartuutit amerlingaluttuinnarput.

Eqqarsaatigisariaqalinnginnerluni, allaffissornerup ingerlatsinerullu nunatsinnut naleqquttumik naapertuunnerusumillu ingerlanneqalersinnaanera. Soorlu assersuutigalugu Savalimmiuni Island-

imilu misilittakkat atorluarneqarnerulernerisigut? pisariaqartorujussuungunangikkaluarpormi danmark-imi 5-6 mio-inik inulimmi pissutsinik ilaarsiinnarnissaq, nunatsinni innuttaqassutsikkut assigiinnginnerujussuarmut sanilliullugu.

Aningaasartuutitik nakkutilliinissamut siunnersuummut tunngatillugu siunnersuutigissuarput, qaammatit siulliit pingasunngornissaat utaqqinagu, Kommunini Namminersorlutillu Oqartussani, minnerpaamik qaammammut ataasialluni aningaasaqarnermut ataatsimiititaliamut aningaasaqarnikkut killiffik ilisimatitsissutigineqartassasoq, taamaaliornikkut aningaasartuutitik sippuinnginnissaq aqutsilluarnerlu qulakkeerneqaqqullugit.

Taama oqaaseqarlunga siunnersuutip aappassaanneerneqannginnerani inatsisit atortinneqarnerannut ataatsimiititalimi suliarineqarnissaa inassutingaarput.